

Wallensköld

I.

De ma dame souvenir
fet Amors lié mon corage,
qui me fet joiant morir,
si la truis vers moi sauvage.
La bele que tant desir
fera de moi son plesir,
que touz sui siens sanz faussex
*nus ne puet trop acheter
les biens qu'Amors set doner.*

II.

Bele et bone, a vos servir
vueil estre tout mon aage,
si sui vostres sanz faillir
et de cuer et de corage.
Car me daigniez retenir,
Amors, par vostre plesir!
Fetes li de moi menbrer!
*Nus ne puet trop acheter
les biens qu'Amors set doner.*

III.

Une costume a Amors,
qui ami forment guerroe:
plere li fet ses dolours.
Ce me semble, por la moie,
que nus biens ne puet d'aillors
venir fors du haut secors
qu'en li me doint Deus trouver.
*Nus ne puet trop acheter
les biens qu'Amors set doner.*

IV.

Et qui ses tres granz valors
recorderoit, toute voie
est de sor les meillors;
qu'adès m'estuet que la voie
et que sa fresche colors
soit en mon cuer mireors.
Deus! con s'i fet biau mirer!
*Nus ne puet trop acheter
les biens qu'Amors set doner.*

VI.

Atendre m'estuet ensi,
si m'est vis que je foloie.
Ja n'i cuit trouver merci,
si feré, voir, toute voie;
qu'en ma dame trop me fi,
ne je n'ai pas deservi
que si me doie grever.
*Nus ne puet trop acheter
les biens qu'Amors set doner.*

VII.

Chanson, va t'en tost et di
a Blazon, a mon ami,
que il te face chanter!
*Nus ne puet trop acheter
les biens qu'Amors set doner.*

- letto 440 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-29>